

## **Pútín: Aðgerðir Vesturlanda beinast að kosningaárunum 2016 og 2018 í Rússlandi**

**Eftir Styrmi Gunnarsson**

Í ræðu Pútíns, Rússlandsforseta á fundi hjá rússnesku leyniþjónustunni sl.fimmtudag, sem sagt hefur verið frá hér á Evrópuvaktinni, kom fram að þær aðgerðir Vesturlanda, sem hann lýsti þar beindust sérstaklega að árunum 2016 og 2018 en á næsta ári fara fram þingkosningar í Rússlandi og 2018 fara fram forsetakosningar.

Frá þessu segir Barents Observer.

Pútín sagði í ræðunni að stjórnvöld vildu halda uppi skoðanaskiptum við stjórnarandstöðuna og samskiptum við samfélagið í heild. En hann sagði tilgangslaust að eiga slík skoðanaskipti við þá, sem tækju við fyrirskipunum erlendis frá.

Hann undirstrikaði að stjórnvöld mundu áfram fylgjast með félagasamtökum, sem störfuðu að lauslega skilgreindum pólitískum markmiðum og nytu fjárstuðnings frá öðrum löndum.

Meðal þeirrar starfsemi, sem fellur undir þessa skilgreiningu Rússlandsforseta eru skrifstofur sem Norðurlandaráð hefur starfrækt í norðvesturhluta Rússlands, en þeim hefur nú verið lokað í kjölfar kröfu um að þær yrðu skráðar sem „útlendir agentar“.